



AKUERDO DI GOBERNASHON

Partido Demokrátiko & Union Patriótico



Konsiderando ku:

- komunidad di Boneiru dia 18 mart 2015 por medio di voto popular den un elekshon liber i sekreto a ekspresá klaramente su eskoho pa representantenan di pueblo den Konseho Insular pa yega na un gobièrnu nobo pa Boneiru pa e próksimo kuater añanan;
- e situashon soshal-ekonomíko i bienestar general di nos poblashon, partidonan ta deseá seriamente pa por tin union den nos komunidad, lagando divishon i antagonismo tras di lomba pa konhuntamente a base di buena fe traha pa un mihó porvenir pa pueblo di Boneiru den su totalidat;
- resultado definitivo di kantidat di asiento i votonan popular optené pa kada partido lo reflehá den representashon den Governashon di Boneiru basá riba rèspèt mutuo, buena fe, seriedat, konfiansa, ku interes general di pueblo boneriano na promé lugá;

Pa e periodo benidero partidonan ta rekonosé e siguiente áreanan prinsipal di maneho:

I. ASUNTUNAN GUBERNAMENTAL

Pueblo Boneriano ta anhelá union i stabilitat i pa e motibu ei meresé un Gobièrnu stabil i duradero. Nos Gobièrnu ta reflehá e deseo aki i lo hiba un maneho íntegro i efisiente pa brinda servisio na un manera transparente i efektivu na nos Pueblo;

II. FORMASHON, ENSEÑANSA I DESAROYO PERSONAL

E rekursu prinsipal di nos Isla ta nos hende. Pa e motibu aki nos gobièrnu lo hiba un maneho pa invertí den nos hende pa brinda tur oportunitat disponibel pa por logra su máksimo talento i kapasidat. Tur invershon lo mester kontribuí na desaroyo di e asina yama “Boneriano Outónimo”;

III. MANEHO SOSIAL, BIENESTAR I KUIDO

Kada un ser humano tin derecho riba un porvenir digno. Nos Gobièrnu lo hiba un maneho pa aportá, sostené, stimulá i desaroyá e oportunitat i derecho di kada un ser humano pa biba un bida digno den seguridat i felisidat;

IV. DESAROYO EKONÓMIKO I REKURSO NATURAL

Boneiru ta un pèrta úniko den mundu ku un potensial enorme. Nos Gobièrnu lo hiba un maneho pa brinda oportunitat pa desaroyá e potensial aki na su máksimo kapasidat pero na mes momentu protehá nos ilustre úniko pa próksimo generashonnan;

V. ASUNTUNAN ESTATAL I RELASHON KU REINO I EKSTERIOR

Kada Pueblo trempa òf lat ta deseá di karga responsabilidad di su propio porvenir. Nos Governashon lo entamá pa krea i desaroyá e kapasidat di nos pueblo pa por karga e responsabilidad aki;

Partidonan ta deklará di a yega na un akuerdo pa formashon di un gobièrnu pa Boneiru pa e periodo di gobernashon di Aprel 2015 pa Mart 2019, i ta kombatí:



AKUERDO DI GOBERNASHON

Partido Demokratiko & Union Patriotico



I. ASUNTUNAN GUBERNAMENTAL

- 1) pa evaluá e funshonamentu di e aparato Gubernamental i su direktoradonan riba integridat, ophetividat, efisiensia, efektivitat i kaminda nesessario, entamá un prosedura transparente pa adaptá esakinan;
- 2) pa evaluá Lei, regla i proseduranan vigente riba nan efektivitat i kaminda nesessario, entamá prosedura transparente pa adaptá esakinan;
- 3) pa stimulá kurso i formashon di empleadonan públiko pa mehorá konosementu den nan trabou i alsa kalidat di nan funshonamentu;
- 4) pa adaptá e plan integral di mas aña (Geintegreerd Meerjarenplan) na prioridatnan aktual;
- 5) pa respetá i apliká e kódigo di komportashon pa mandatarionan (gedragscode politieke gezagdragers);
- 6) pa formulá i introdusí un kódigo di komportashon pa empleadonan públiko;
- 7) pa eliminá opstákulonnan burokrátiko, fortalésé i mehorá efisiensia di e aparato gubernamental;
- 8) pa evaluá elekshon di Konseho Insular di 18 di Mart 2015, Lei Elektoral(Kieswet) i e sistema di apoderashon (volmacht) en partikular;
- 9) ku PDB ta apuntá dos (2) diputado i UPB ta apuntá un (1) diputado ku un repartishon di portafolio i tarea den Kolegio Ehekutivo manera stipulá den anekso B;
- 10) ku den e promé reunion di e Kolegio Ehekutivo nobo di Boneiru lo formalisá e repartishon manera akordá den anekso B;
- 11) ku desishonnan di maneho di Kolegio Ehekutivo lo keda tumá basá riba e prinsipio di kolegialidat;
- 12) pa presentá na Konseho Insular un programa di gobernashon pa e periodo 2015-2019 dentro di tres (3) luna despues di asumí responsabilidad gubernamental;

II. FORMASHON, ENSEÑANSA I DESAROYO PERSONAL

- 1) pa invertí den sistema, infrastruktura i programanan di formashon, edukashon, deporte (Sportbeleidsplan) i rekreo:
 - a) pa fomentá e Boneriano Outónomo pa esaki tin konfiansa den su propio kapasidat, ta biba ku un ambishon pa ekselensia i ku tin disiplina di trabou pa asina ta un suidadano responsabel ku por logra lo máksimo di su talento;
 - b) pa krea profeshonalnan den fishi ku tin demanda p'e riba nos merkado lokal;
 - c) por ta mas produktivo i ekselá den merkado i servisio ku nos ekonomia ta sirbi;
 - d) por desaroyá i akapará un ekonomia diversifiká ku por brinda servisio i merkadonan nobo;
- 2) pa duna kada hóben e oportunitat pa desaroyá su mes na máksimo di su talento i kapasidat; invertí den desaroyo di kultura (Cultuurbeleidsplan) i idioma di nos pueblo pa un desaroyo sano i duradero di nos identidat propio;

III. MANEHO SOSIAL, BIENESTAR I KUIDO

- 1) pa rekonos'é estudio NIBUD komo punto di salida pa entrada mínimo i insistí serka Hulanda pa legislá e montantenan menshoná komo presupuesto di ehèmpel komo Entrada Mínimo pa habitantenan di Boneiru;
- 2) pa ankra e nivel di ònderstant i penshun di behes komo un porsentahe di e Entrada Mínimo definí den e lei ariba menshoná;



AKUERDO DI GOBERNASHON

Partido Demokrátiko & Union Patriótico



- 3) pa anualmente indeksá entrada mínimo, ònderstant i penshun di behes konforme reportahe di inflashon hasí pa Ofisina Sentral di Statistik;
- 4) pa ankra e nivel di pia di impuesto (Belastingvrijevoet) na entrada mínimo manera stipulá den NIBUD;
- 5) pa stimulá adaptashon di tur skol básiko na e modelo di skol amplio. Hasi mantenshon di skolnan den barionan; traha akohida di krísis pa hóben i hende muhé adulto;
- 6) pa invertí den proyekto integral di barío riba terenonan di labor, formashon, deporte, rekreashon, kultura, asuntunan soshal i di bienestar, infrastruktura e.o. kamindanan, bibienda, edifisionan, telekomunikashon i transporte. Gruponan di enfoke ta e grupo vulnerabel den nos komunidad;
- 7) pa entamá un proseso pa introdusí un lei òf regla manera e WMO (Wet Maatschappelijke Ondersteuning) di Hulanda ku lo mester aloká e fondonan nesario pa kubri e gastunan den presupuesto di Entidat Públiko Boneiru pa hendenan ku por ehèmpel no por paga fisioterapia i dentista;
- 8) pa invertí den proyektonan pa e hende por produsí su propio kuminda, krea e kondishonnan nesario pa hasi esaki posibel;
- 9) pa yega na un banko di krédito soshal pa duna hendenan ku debe serio i struktural, un chèns pa kuminsá di nobo, bou di guia di proyektonan di maneho finansiero;
- 10) pa krea un struktura pa kontrolá i influensha preisnan di komestibel;

IV. DESAROYO EKONÓMIKO I REKURSO NATURAL

- 1) pa stimulá desaroyo kreashon di empresa chikitu, empresa mediano i koperativismo pa di tal forma krea kuponan di trabou duradero;
- 2) pa ehikutá un Milieu Effecten Rapportage [M.E.R] onderzoek stratégiko delantá pa teritorio di Boneiru ku ta duna un indikashon di e riesgo di impakto pa posibel desaroyo;
- 3) pa adaptá e plan di Zonafikashon (Ruimtelijk Ontwikkelingsplan Bonaire) a base di e Plan Maestro (Masterplan 2010-2025) i resultado di M.E.R stratégiko;
- 4) ku konhuntamente ku merkado lo formulá un plan stratégiko di turismo (Strategisch Toeristisch Plan) pa desaroyo duradero di nos infrastruktura i produkto turístiko;
- 5) pa invertí den nos infrastruktura turístiko pa halsa kalidat i produktividat di nos produkto turístiko;
- 6) pa desaroyá merkadonan turístiko nobo, invertí den nos produkto pa akapará esaki;
- 7) pa invertí den nos infrastruktura pa stimulá diversifikashon di nos ekonomia ku entre otro aktividat ekonómiko konsiderá komo "High-Tech / High-Yield";
- 8) pa stimulá desaroyo di un industria di e-commerce servisionan di época moderno;
- 9) pa desaroyá maneho pa stimulá konstrukshon i òf kompra di bibienda propio pa nos pueblo;
- 10) pa invertí den desaroyo di un ret di transporte públiko;
- 11) pa instituí un maneho pa protekshon proaktivo di nos rekurso natural i medio ambiente ku ta promové un desaroyo duradero di nos ekonomia;
- 12) pa invertí den nos agrikultura i krio di bestia i Peska lokal pa akapará un grado mas haltu di nos konsumo lokal;



AKUERDO DI GOBERNASHON Partido Demokratiko & Union Patriotico



V. ASUNTUNAN ESTATAL I RELASHON KU REINO I EKSTERIOR

- 1) pa formulá i instalá un ofisina di representashon polítiko i komersial di Boneiru na Hulanda/Oropa;
- 2) pa formulá i instalá un ofisina di representashon polítiko i komersial di Boneiru pa (Latino) Amerika;
- 3) pa traha huntu ku e otro dos islanan di Hulanda Karibense den lineanan grandi pa ku e aserkamentu di Hulanda;
- 4) pa implementá mekanismo di konsulta riba maneho ku ta regardá Boneiru konforme akuerdonan eksistente;
- 5) pa evaluá e régimen fiskal aktual pa trese alivio pa e konsumidó Boneriano i stimulá invershon den nos merkado;
- 6) ku ta organisá un referèndem pa pueblo por haña oportunitat di ekspresá su mes den un forma liber konforme anekso B;
- 7) pa establese relashonnan regular estrecho ku pais i islanan den region;

Kralendijk, 17 di April 2015,

Na nòmber di
Partido Demokratiko Boneriano

Na nòmber di
Union Patriotico Boneriano

Sra. Jessy M. Crestian
Presidente

Sra. Maritsa D. Silberie
Presidente

Miembronan di Konseho Insular:

Miembronan di Konseho Insular:

Sr. Clark C. A. Abraham

Sr. Pablo J. Kroon

Sr. Robert C. M. Beukenboom

Sra. Esther J. Bernabela

Sra. Marugia S. M. Janga

Sr. Edsel S. Winklaar

-----//-----